

INFORMACIJA O AKTIVNOSTIMA OPĆINSKE IZBORNE KOMISIJE NOVO SARJEVO

Dana 8. januara 2024. godine Općinska izborna komisija Novo Sarajevo je održala **20. redovnu sjednicu** na kojoj je razmatran usvojeni budžet OIK-a za 2024. godinu u iznosu koji je za nekoliko desetina hiljada konvertibilnih maraka manji od predloženog budžeta, te usvojili zaključak da se uputi zahtjev za dostavljanje informacija o analitičkom obrazloženju usvojenog budžeta za 2024. godinu, kako bi se moglo identificirati na kojim budžetskim stavkama su umanjena sredstva OIK-a u odnosu na predloženi budžet, te da se utvrdi da li je moguće sa usvojenim budžetom provesti Lokalne izbore 2024. godine.

Općinska izborna komisija Novo Sarajevo je održala **21. redovnu korespondentnu sjednicu dana 22. januara 2024. godine** na kojoj je jednoglasno usvojen jedinstveni Izvještaj o rezultatima provedenih izbora za članove savjeta 18 mjesnih zajednica na području općine Novo Sarajevo, sa finansijskim izvještajem utroška sredstava za sprovođenje izbora na osnovu zaključka Općinskog vijeća Novo Sarajevo kojim je traženo da se objedine oba izvještaja. Na sjednici je član Srđan Lazar koji je obavljao funkciju zamjenika predsjednika OIK-a informisao članove OIK-a da više ne želi obavljati tu funkciju, te zahtijevao da bude razriješen.

Dana 13. februara 2024. godine Općinska izborna komisija Novo Sarajevo je održala svoju **23. redovnu sjednicu**. Uzimajući u obzir da je na prethodnoj sjednici član Srđan Lazar podnio zahtjev za razrješenje na mjesto zamjenika predsjednika OIK-a, navedenu funkciju je preuzela članica Jasna Nikšić prema članu 8. stav 3. Poslovnika o radu Općinske izborne komisije Novo Sarajevo, koja je iduća najstarija po godinama života, do imenovanja predsjednika. Na sjednici su prvenstveno jednoglasno usvojeni Izvještaji o radu Komisije za period juni-decembar 2023. godine i Izvještaj o radu, nadgledanju i kontroli CBS, koje je OIK u obavezi dostaviti Centralnom izbornoj komisiji. U daljem toku sjednice je vođena diskusija o realizaciji zaključaka sa prethodnih sjednica, te oni koji nisu realizovani da se u što kraćem roku realizuju. Uzimajući u obzir da je rubrika OIK-a na službenoj stranici Općine nepregledna, zbunjujuća i nejasna, na sjednici je jednoglasno usvojen zahtjev za uređenje rubrike OIK-a, a prvenstveno izdavanje OIK-a iz sekcije Općinskog vijeća Novo Sarajevo, obzirom da OIK nije radno tijelo vijeća.

Politika javnosti i transparentnosti: Općinska izborna komisija podsjeća da je njen rad javan i transparentan, u skladu sa Izbornim zakonom, podzakonskim aktima Centralne izborne komisije BiH i Poslovníkom o radu Općinske izborne komisije. Informacije o aktivnostima Općinske izborne komisije redovno i blagovremeno se objavljuju na web stranici Općine Novo Sarajevo, dok su njene sjednice, u pravilu, otvorene za javnost.